



# Center da sport e cultura

## Credit pil remplazzament da suppias e meisas



### M E S S A D I

dalla suprastanza communal a cussegl da vischnaunca

Preziau signur president  
Preziadas signuras cusseglieras  
Preziai signurs cussegliers

All'entschatta dils onns 1970 ha il turissem a Mustér priu ina nova dimensiun cun la construcziun dallas pendicularas e dil Hotel Acla da Fontauna. Ord quei catsch ei l'idea d'ereger il Center da sport e cultura (CSC) ton per indigens sco per hosps naschida.

Ils 6 da fevrer 1972 ha la radunonza communal decidu d'acquistar il terren pil CSC ad Acla da Fontauna (surfatscha = 33'362 m<sup>2</sup>). Il terren ei da siu temps vegnius mess a disposiziun dalla Claustra da Mustér per cundiziuns favoreivlas.

Dapi sia construcziun ei il CSC carschius ad in impurtont e beinfrequentau liug da sentupada da renum regional. Oz surveschan las localitads ad occurrenz da sport, cultura ed economia sco era allas scolas ed uniuns. Il CSC ei era in zun impurtont element dalla purschida turistica sisum la Cadi. Quella impurtonza vegn a crescer ils proxims onns. Ils davos onns ha il diever dallas localitads dalla protecziun civila saviu vegnir augmentaus successivamein. Cun biebein 14'000 pernottaziuns per onn ei il CSC daventaus in impurtont purschider da dimora a Mustér. Las pernottaziuns pils onns vegnents ein fetg empermettentas.

1980 ei succediu la construcziun dalla part principala dil CSC cun la halla plurivalenta, la halla da tennis e la cafetaria. L'engrondaziun entras il post da commando (KP III), la Sala Fontauna cul plaz dir sco tetg, la piazza da ballapei, la patinera e plirs indrezs da sport ei vegnida realisada tredisch onns pli tard.

Annualmein han repetidamein arranschaments communal, regionalas, gie schizun naziunals liug el CSC. Il mobilar avon maun ha teniu ora biars onns e susteniu tschiens eveniments da tuttas sorts. Las suppias e measas (las retschercas egl archiv communal han anflau negins resultats) vegnan ad esser varga 30 onns veglias. Ina remedura resp. in remplazzament ei daventaus inevitabels.

## **Remplazzament suppias e measas**

Sco fatg allusiun han las suppias e measas dil CSC gia surpassau dapi onns sia limita da veta. Quei cumprovan cunzun las reclamaziuns giustificadas dallas uniuns indigenas e dils camps d'ordeifer. Il remplazzament da quei mobiliar ella Sala Fontauna ed ella Halla Fontauna ei gia daditg urgents.

El preventiv 2016 figurescha la summa d'in quart milliun francs per quella midada. Leu era denton previu da sulettamein remplazzar treis quarts dil mobiliar. Entras negoziaziuns dil niev meinafatschenta sa ussa tuttina igl entir mobiliar vegnir remplazzaus per frs. 190'000.--, frs. 60'000.-- pli favoreivel che previu. Aschia eis ei previu da comprar 780 suppias (Halla Acla) e 120 suppias pulstradas (Sala Fontauna) sco era 150 measas per omisduas hallas. Era ils indrezs da transportar il niev mobiliar e da fermar las suppias tier in pli grond arranschament (prescripziun dalla polizia da fiug) ein previ da remplazzar ed ein cunteni ell'offerta. La pusseivladad da numerar las suppias ei era cuntenida en la damonda da credit.

La fatschenta indigena Mobiliars Fry vegn a vender a nus igl uorden che drova in temps da furniziun dad 6 - 8 jamnas. Sil mobiliar vegn dau tschun onns garanzia. L'offerta avon maun ei ina offerta da concorrenza faira ch'ei vegnida cumparegliada cun auters products ed autras interpresas.

Las mobiliars previdas per la cumpra ein exponidas naven dils 6 entochen ils 22 d'avrel 2016 per investa ella cafetaria dil CSC. Aschinavon ch'il credit vegn concedius entras il cussegl da vischnaunca, vegnan las mobiliars remplazzadas il zercladur 2016.

**Maletgs dil mobiliar niev**



## Cuosts

Pil remplazzament dil mobiliar ei previu el preventiv 2016 ina summa da frs. 250'000.--. Sco gia fatg allusiun sa igl entir mobiliar vegnir remplazaus per frs. 54'000.-- pli pauc che previu, aschia che l'expensa efectiva munta a frs. 196'000.--.

<i>Object</i>	<i>Diember</i>	<i>Prezi singul en frs.</i>	<i>Total en frs.</i>
Suppias buca pulstradas	780	219.--	170'820.--
Suppias pulstradas	120	324.--	38'880.--
Meisas	150	838.--	125'700.--
Carrs da transport per las meisas	2	1'018.--	2'036.--
Carrs da transport per las suppias	4	439.--	1'756.--
Indrezs per numerar las suppias	900	7.--	6'300.--
Fermagls denter las suppias	900	9.--	<u>8'100.--</u>
Subtotal			353'592.--
./. Rabat d'object			<u>172'292.--</u>
Summa senza TPV			181'300.--
8 % taglia sin plivaleta			<u>14'504.--</u>
<b>Summa totala</b>			<b>195'804.--</b>

## Proposta

Sebasond sin sura consideraziuns

### propo na

la suprastonza communal al cussegl da vischnaunca da:

- conceder in credit da frs. 196'000.-- pil remplazzament dallas suppias e meisas dil CSC.

Suprastonza communal Disentis/Mustér  
Il president:



Francesco Cajacob

Il canzlist:



Andri Hendry

Disentis/Mustér, ils 5 d'avrel 2016